



食貨典第一百四十卷

賦役部總論三

大全集 延和奏劄四

臣竊見江西路諸州舊有科罰之敝蓋因歲入有限而費出無常是以不免巧取於民以備支發凡是百姓有事入門不問曲直恣意誅求無有藝極民間受敝不可勝言爲監司州縣者欲一切繩之以法則財計頓闕州縣不可復爲雖有良吏亦無以免若一切恣之不問則法廢不行民怨無告而貪虐之吏更復並緣以濟其私爲害愈甚前此漕司蓋嘗頗捐羨錢以補州縣歲計之闕而禁其科罰然後遠民得以粗安然聞其間亦有循習舊態未能驟革去處欲望聖慈特降睿旨令本路帥臣諸司博訪事宜共行指畫逐一條奏以俟聖裁庶幾官用不乏民賦有經仰寬宵旰之憂潛消災沴之氣一路幸甚取進止

乞放免租稅及撥錢米充軍糧賑濟狀

臣伏觀本軍今爲久闕雨澤早田旱損已依準令式具狀奏聞詎照對本軍地荒田瘠稅重民貧昨

於乾道七年曾遭大旱伏蒙聖恩放免本年夏秋二稅錢米納絹共八萬六千三百二十貫石匹及詔本路監司應副軍糧米四千石撥到糴軍糧米錢九千餘貫并撥本軍未起米一萬一千七百餘石本軍借兌過乳香度牒錢一萬餘貫湊糴軍糧支遣官兵及撥到賑濟米五萬石又拖欠兩年上供折帛月椿等錢共九萬三千四百一十六貫石匹兩然後遺民復得存活以至今日今茲不幸復罹枯旱之災又蒙陛下親降御筆深詔守臣精加祈禱而臣奉職無狀無以感格幽明祈禱兩月殊無應效今則早田十損八九晚田亦未可知正得薄收其數亦不能當早田之一二訪聞耆老云乾道七年之旱雖不止於如此然當時承屢豐之後富家猶有蓄積人情未至驚憂又以朝廷散利薄征賑給之厚而人民猶不免於流移殍死閭井蕭條至今未復況今民間蓄積不及往時人情已甚憂懼目下軍糧便闕支遣計料見管常平斛斗亦恐將來不足賑濟支用若不瀝懇先自奏聞竊恐將來流殍之禍及他意外之憂又有甚於前日欲望聖慈早降睿旨許依分處放免租稅外更令轉運常平兩司多撥錢米應付軍糧準備賑濟則一郡軍民庶幾不致大段狼狽冒犯天威臣無任恐懼待辜之至

乞撥賜檢放合納苗米充軍糧狀

準尙書省劄子宣教郎權發遣南康軍朱熹奏爲今歲旱傷除接濟饑民一事常平司已行措置惟有軍糧歲用二萬七千五百一十三石並無窠名支撥乞將淳熙六年未起米五千石并今年苗米檢放外餘數乞盡行撥賜充軍糧及賑糶賑給支用奉聖旨令本路提舉常平司將所部州軍應管常平義倉錢米通融寬數支撥外許本軍將淳熙六年未起米並皆盡數存留充軍糧及賑糶等支用內糶到價錢令項椿管非奉朝廷指揮不得擅行支使其淳熙七年分來候見得實旱傷分數別行申取朝廷指揮本軍除已遵稟施行外今據星子都昌建昌縣申到檢放通計八分四毫四絲所有今秋苗米管催四萬六千五百餘石除放八分四毫四絲計米三萬七千四百餘石外外合給米九千九十餘石竊緣本軍一年支遣米計二萬七千五百一十三石政使盡蒙撥賜上項米斛其於歲計尙缺支遣若於數內更令起發卽其狼狽又將有不可勝言者欲望聖慈矜憐孤遠特許盡數支撥上件放外苗米與充軍糧則一郡軍民不勝幸甚伏候敕旨

乞將山陰等縣下戶夏稅和買役錢展限起催狀

照對紹興府諸縣去歲水旱相仍田禾損傷人民饑餓幸蒙聖恩給賜錢米廣行賑救以至今日二麥既已成熟民之幸免於死亡者亦稍蘇息全藉官司存恤休養方可安業今不住據屬縣第四第五等人戶列狀陳稱災傷之餘生理未復竊恐和買役錢夏稅綿絹準例起催乞特與具奏放免一年臣照得人戶夏稅綿絹是朝廷常賦難以放免外惟是起催省限在五月十五日竊見下戶今春乏食養蠶甚少二麥雖熟亦只得供給口食尙慮將來青黃未接更有闕食之患所有稻田又方蒙聖恩借給秧本始得布種向去早禾成熟尙遠若或依限便行起催竊慮細民未有可以送納不免追呼之擾却致逃移欲望聖慈特降睿旨將紹興府最荒蕭山諸暨嵊縣會稽山陰五縣第四第五等戶合納今年夏稅和買役錢與展限兩月起催庶幾新穀成熟之時可以送納所有上三等戶自從常年條限催理如蒙開允從臣所乞則上既不虧縣官經常之費下可少安饑餓羸困之人誠爲兩便

乞住催被災州縣積年舊欠狀

臣伏觀四月二十二日聖旨指揮紹興府蕭山諸暨會稽山陰嵊縣五縣并嚴州諸縣各爲去年水

早最甚可將第四第五等人戶合納今年夏稅和買役錢並特與展限兩月起催內有願依條限送納之人聽從其便仰見陛下愛育黎元天地父母之意臣竊慮州縣奉行不虔仰稽睿澤卽以鑠板多印小榜散下紹興府五縣曉示去詒臣訪聞本路被災州縣知通令佐多有只見蠶麥稍熟便謂民力已蘇遽於此時催理積年舊欠上下相乘轉相督促使斯民方幸脫於溝壑之憂而一旦便罹追呼決撻囚繫之苦甚可哀痛況今疫氣盛行十室九病呻吟哭泣之聲所不忍聞豈堪官吏更加殘擾臣雖已行下諸州及通判約束外尙慮未能禁戢欲望聖慈特降指揮令被災最重州縣如紹興府衢婺州且據今年合納官物照應三限條法勸諭人戶及時送納其積年舊欠直候秋冬收成之後逐科帶催庶幾饑餓餘民得以有活其溫台等州去年災傷雖不至甚然亦不爲樂歲并乞同此指揮戒飭官吏不得意外生事妄有騷擾則一路生民蒙被德澤不勝幸甚臣以狂妄曲荷優容偶有所聞不敢不奏累瀆天威臣無任戰栗俟臚之至須至奏聞者

乞將合該蠲閣夏稅人戶前期輸納者理折今年新稅狀

臣昨備據紹興府士民魏必大等狀陳訴具狀申奏朝廷乞行下紹興府將災傷諸縣自第一等至

第五等人戶照應淳熙八年已納夏稅和買役錢等依秋苗檢放分數除豁外有餘剩納過分數與理折今年合納夏稅事續承降五月三十日省劄戶部勘當卽不委本府去年受納到人戶錢物自第一等至第五等各等各戶納到若干分數比秋苗有無多納過錢絹綃綿數目獲奉聖旨指揮劄下開具保明供申臣已恭稟施行及照得取會各等逐戶數目緣諸縣戶名萬數浩瀚竊慮遲延有妨催科繼已具申尙書省今一面取會到諸縣去年總計管納夏稅官物除園山陸地浮財屋產外其湖籍田共計合納二十八萬六千三十七屯匹三丈六尺七寸五折帛役錢等二十萬三千四百九十六貫七百五十文除被水淹浸倚閣蠲免及人戶納到錢帛外有未納共五萬三千五百七十六屯匹一丈五尺一寸六分錢四萬一千四百六十一貫二百六十八文若以檢放秋苗分數合計七萬一千三百七十八屯匹一丈七尺八寸錢一十萬九千五百一十六貫二百八十二文外諸縣止有剩納三萬七千八百九屯匹三丈九尺八寸六分錢七萬七千二百三貫九百二十六文在官乞理作今年合納之數臣照對紹興府諸縣所管湖籍田畝出納夏秋二稅官物去年緣爲災傷其秋苗係隨田內禾稻輕重檢放其所輸夏稅雖因水災得蒙蠲闕後來繼卽遭旱水不及處亦無

所收緣以未收成以前起催所以人戶多不需被減放之恩又八月內降到蠲闕指揮之時人戶之
善良畏事者皆已輸納其得被聖恩者實皆頑猾之戶事體輕重甚不均一臣又竊覩去歲災傷饑
民猥衆尙蒙聖恩撥賜錢米救濟豈有田內夏稅已蒙蠲闕人戶前期誤行輸納者却不與理折今
年新稅甚非朝廷矜恤之意況今夏以來諸邑又多亢旱斯民接連饑荒方苦艱食當此催科之時
委實無可輸納若不蒙朝廷特加優恤必見失所況以諸縣數百萬戶口今來所乞通理剩納之數
其爲物帛止三萬七千八百九十七屯匹三丈九尺八寸六分錢止七萬七千二百三貫九百二十
六文數目既少於朝廷所損不多而民戶可霑實惠欲望聖慈俯賜允從特降指揮將人戶去年剩
半前項數目與理作今年之數蠲豁庶幾嗷嗷之民得以安業須至奏聞者

奏台州免納丁絹狀

臣巡歷至台州據屬縣人戶陳狀稱逐年身丁每丁合納本色絹三尺五寸并錢七十一文被州縣
登承抑納絹七尺其實本州每丁只發納上供三尺五寸却將錢七十一文令人戶倍輸折納本色
竊念本州縣人戶連遭荒旱細民艱食見蒙追催緊急無所從出乞將遞年多納理作今年合納其

今年倍納在官乞理爲來年合納之數臣喚到台州典級楊松年陸迅等供拖照案例臨海五縣人戶合納丁絹除第一等止第四等係將丁產稅錢併紐科納絹帛外所有第五等丁絹檢准建炎三年十一月三日德音節文兩浙人戶歲出丁鹽錢每丁納錢二百二十七文並令納絹一丈綿一兩是太重自今第五等以下人戶一半依舊折納外餘一半折納見錢台州人戶身丁每丁供鹽稅錢一百四十一文足折納絹七尺自紹興三年首正將第五等人戶丁鹽錢除一半折納絹三尺五寸外有一半折納見錢七十文足五分計減退本色絹數是致缺少絹帛支遣本州於紹興四年相度貼支官錢揆納具申朝廷獲奉聖旨令台州椿管見錢與人戶納到數目依市價賣發不得科數騷擾本州自紹興四年以後却將第五等人戶合納一半丁錢七十文五分足紐納絹三尺五寸照得第五等人戶計一十九萬九千八十四丁合納丁鹽錢二萬八千七百貫八百四十四文除一半納本色外有一半止合納丁錢一萬四千三十五貫四百二十二文足本州却將上伴丁錢紐作本色絹三尺五寸催納計絹一萬六千五百九十四一丈二尺以致人戶陳理今來若放免一半丁絹却合催納一半丁錢一萬四千三十五貫四百二十二文足其所免上伴丁絹本州逐年自有支用

趨剩紬絹一萬六千二百餘匹可以通那充官兵等支遣不碍起發上供綱運之數臣對照台州諸縣連年災傷細民重困若不優加存恤必見流移其第五等人戶所納丁稅既有元隆建炎三年指揮許納一半見錢自不應並納本色今來台州若免納一半丁絹本州自有趨剩紬絹可以通那支遣不碍起發上供之數委無相妨臣已行下台州及臨海等縣遵照建炎三年獲降聖旨令人戶逐年每丁送納絹三尺五寸并一半見錢七十文五分足免致重困貧民下戶不得仍前違戾科抑外須至奏聞者

奏義役利害狀

臣巡歷到處州竊見本州昨奉聖旨依布衣楊權所請結立義役此見陛下愛民之切雖草茅之言苟有便於民者無不采納施行天下幸甚然本州目今奉行却有未盡善者如令上戶官戶寺觀出田以充義田此誠善矣而本州却令下戶只有田一二畝者亦皆出田或令出錢買田入官而上戶田多之人或却計會減縮所出殊少其下戶今既被科出田將來却不充役無緣復收此田之租乃是困貧民以資上戶此一未盡善也如逐都各立役首管收田租排定役次此其出納先後之間亦

未免却有不公之弊將來難施刑罰轉添詞訴此二未盡善也如又逐都所排役次今日已是多有不公而況三五年後貧者或富富者或貧臨事不免却致爭訟此三未盡善也所排役次以上戶輪充都副保正中下戶輪充夏秋戶長上戶安逸而下戶倍費此四未盡善也凡此四事是其大槩目下詞訴紛然何況其間更有隱微曲折未可猝見若不兼採衆論熟加考究竊恐將來弊病百出詞訴愈多改之則枉費前功不改則反貽後患將使義役之名重爲異議者所笑無復可行之日誠有未便臣昨見紹興府山陰縣見行義役只是本縣勸諭人戶各出義田均給保正戶長各有畝數具載砧基其保正戶長依舊只從本縣定差更不別置役首亦不先排役次而其當役之戶既有義田可收自然樂於充應不至甚相糾訐但其割田未廣去處未免尙仍舊弊若更葺理增置便無此患竊謂其法雖似闊疎然却簡直易明無他弊病且又不須衝改見行條法委實利便故嘗取其印本砧基行下州縣然以未經奏請畫降指揮州縣往往未肯奉行臣愚欲望聖慈詳酌行下處州止令合當應役人戶及官戶寺觀均出義田罷去役首免排役次止用山陰縣法官差保正副長輪收義田仍令上戶兼充戶長俟處州行之有緒却令諸州體倣施行庶幾一變義風永息爭競須至奏聞

者

按知台州唐仲友第二狀

臣昨訪聞知台州唐仲友催稅急迫致得民戶流移等事卽具大略奏聞今巡歷到本州天台縣據人戶遮道陳訴本縣夏稅絹一萬二千餘匹錢三萬六千餘貫緣本州催促嚴峻六月下旬已納及絹五千五百餘匹錢二萬四千餘貫而守臣唐仲友嗔怪知縣趙公植催理遲緩差人下縣追請赴州縣人聞之相與號泣遮攔公植回縣情愿各催戶下所欠零稅絹二千五百匹限十日內赴州送納方得放免仲友遂專牒縣尉康及祖催納零稅更不照應三限條法及近日累降指揮牒內明言要在六月終以前一切數足又牒縣尉催淳熙七年八年殘欠官物專差人吏牟穎在縣監督及節次差下承局禁子等人絡繹在道乞覓騷擾無所不至又據寧海人戶論訴本州差天台主簿張伯溫及州吏鄧椿姜允在縣催督去年殘米下戶丁稅百端騷擾本司見行追問未到而聞張伯溫在寧海追呼急迫本縣人戶不堪其擾相與羣聚喧譟欲行歐擊伯溫知之僅得走免臣竊惟台州頻年災傷民力凋弊仲友儒臣幸得蒙恩典郡專以布宣德澤摩撫疲瘵爲職而乃舞智循私動乖仁

恕在法夏稅省限至八月三十日下限方滿近來戶部擅行指揮必要七月盡數到庫已是違法而仲友乃於戶部所促之限又促一月公行文移督迫屬縣頓辱良吏苦虐饑民使千里之人愁怨嘆息無所告訴甚失聖朝所以選用賢良惠恤鰥寡之本意又況方此饑饉人心易搖萬一果然生事不知何以彈壓臣雖疎賤誤蒙任使職在刺舉不敢不言欲望聖慈先將仲友亟賜罷黜以慰邦人之望其不公不法事件臣當一面審實以聞須至奏聞者

乞蠲減漳州上供經總制額等錢狀

具位臣朱熹伏觀本州昨準本路提刑司牒準尙書省劄子臣僚劄子陛下龍飛正位施實德於民比因臣下有請諸州縣經總制及月椿板帳錢悉議裁減而州縣之巧取於民者自若欲乞行下諸路提刑司應州縣日前以經總制月椿板帳爲名巧作色目科斂民錢以足額者嚴行禁止則朝廷所減爲及民之實惠矣四月二十一日奉聖旨依準及安撫諸司牒準尙書省劄子臣僚上言蠲減之數郡實私之而縣之督責於民者如故乞令諸路監司與州郡公心商議缺乏縣道如崑山常熟之類寬融減放必不得已則聞之朝廷量與蠲減各限一季聞奏監司則開具一路所當減之州守

臣則開具一州所當減之縣仍各要見所減名色錢數若干庶幾灼然能使實惠及民四月二十四日奉聖旨依奏臣伏讀前件兩次所降指揮有以仰見皇帝陛下盛德至仁勤恤民隱至於偏州下邑亦無不欲其蒙被堯舜之澤者甚大惠也然以臣所領一州四縣觀之則雖無月椿一項之輸而諸色上供及經總制無額等錢或全無窠名或收不及額其間亦有州郡已爲抱認代納而諸縣猶或不免違法科罰以足其數者就中漳浦一縣缺乏狼狽尤不可言竊意崑山常熟之類其窘未必至於此也今者本州雖蒙聖恩蠲免經總制額一千貫省然諸縣日前此色官錢除實收外所欠常數千緡以郡計之則又不啻二萬餘貫今者所減雖已不爲不多然逐縣所得在欠數中僅及二十餘分之一若以此故便欲禁其科罰猶恐尙爲虛文況欲遽見其所減放名色之若干乎至於諸色上供全無指擬則前此又未嘗有以聞者州縣官吏以此二弊私憂竊歎以爲不知何時可免斯苦今者乃幸遭遇仁聖憂勤惻惻至於如此而臣於此時適叨委寄得與一季開具聞奏之列若不能罄竭所聞以稱明詔則臣雖死且有餘罪臣竊計度本州財計以及諸縣所無者固無可言所有者名色亦多不正其爲曲折固未易以一言盡今若得蒙聖慈且將州縣所認折茶錢罷科荔枝龍眼

乾錢抱認豐國監鑄不足鉛本錢七千六十四貫及近年通判趙不敵所增經總制無額錢四千七百五十四貫時賜蠲減則諸縣事力庶幾稍可支持而日前科罰之弊亦可漸行禁戢但欲便見其所減之名色錢則恐朝廷所謂蠲減之數實未爲多未容責效如此之速臣謹具條畫前件所陳兩項利害如後須至奏聞者

一臣契勘本州上供錢物一歲之數通及四萬餘貫除一萬七千餘貫買銀五千兩解發又有大禮年分銀一千兩該錢三千五百餘貫不在常年解發數內外一項折茶錢七千貫一項罷科龍眼荔枝乾錢四千貫係逐年尙書戶部準崇寧大觀上供錢物格符下椿辦又一項名爲抱認建寧府豐國監鑄不足鉛本錢其數亦一萬六千貫雖無省符行下然逐年登帶省司帳狀不可分文違欠三色總計二萬三千餘貫是皆無復根原來歷之可考亦無戶限窠名之可催從前只事本州多方那兌一歲僅能趲得一萬二千貫錢起發而其餘一萬一千四十貫則以數下諸縣措置解補向來州郡費出有經縣道亦有寬餘可以椿辦以故移東補西未覺敗缺近年以來州縣增添寄居待缺宗子孤遺養老歸正等官歲所支錢比之往時日有增廣以此州郡窘匱而縣道

急迫日以益甚無復贏餘可以補趲雖於紹興乾道年中兩次蒙朝廷將上件三色上供錢盡數撥下本州應副左翼軍口食馬料及忠順官驛料支遣其錢雖不起發然皆是逐月捐定之數期限促迫尤不可緩而縣道所解往往愆期至乾道五年漳浦一縣趲辦不行州郡不免將其所認錢數減下三千九百七十六貫州郡自行抱認於是本州椿辦之數遂成一萬五千九百七十六貫而諸縣所數猶各不減二千餘貫合三縣共爲七千六十四貫縣道既無贏餘可積又無窠名可催官吏且欲避免一時州郡督責則不過因民之訴訟而科罰之甚則誘人以告訐而脅取之州郡聞知稍行禁約則諸縣便以藉口不肯留心趲辦州郡不免又將別色官錢那兌補足爲州郡者憚其如此則遂一切聽其所爲不復可問不唯非理違法妄取民財之可罪而民之負冤苦而訴於官司者皆無自而得其平矣前後守臣不知其幾目擊此弊能不動心顧以數目浩大別無計策可以斡旋朝廷又無蠲減之意是以不敢遽然有請今幸議臣建白聖明開納許爲蠲減而臣獨幸得遭此時其敢不以實聞而力請之乎然上供錢內所有二萬餘貫買銀之數臣固不敢輕議其三色錢內本州椿辦一萬五千九百七十六貫之數臣亦未敢有請故前所奏只乞聖

慈明詔有司且將諸縣所數七千六十四貫特賜除罷却於本州合發別項朝廷錢內照數截撥添湊應副前項左翼軍忠順官等支遣則庶幾州租有以恤縣縣租有以恤民而海隅蒼生惻獨鰥寡亦可以少被聖主發政施仁之澤矣 一臣契勘經總制錢不當立額不待知者而後知

也蓋其出於倉庫出納田宅契券之所收者雖可約計其大槩然財計有時而虧盈物價有時而高下則其數已有不可得而準者又況所謂無額錢者元無一定窠名可以稽辦其多少不可得而預知故其創立之初直以無額名之則其不當立額也雖至愚亦知之矣而比年以來悉皆立額比較蓋緣紹興十九年中推行經界人戶多有白契不堪照用爭出投印致得當年經總制所收增羨遂有無狀小人獻此殘賊之計一時朝廷既無所誤而其流毒至今未已此本州經制之額所以至於二萬四千六百五十一貫者蓋以紹興二十三年之數爲準也總制之額所以至於五萬五千六百七貫者蓋以紹興二十八年之數爲準也然此其所以爲準者又非當年自然收割之實數皆自後來督責追補之虛額而一時朝廷決意施行官吏不敢爭執遂以至今逐年收取不上常虧一二萬貫至於無額之額則立法以來只以遞年爲額爲錢不過五千三百一十二